



漢紀卷之九

荀悅著

孝景第九

文帝子母竇皇后名啓

皇帝丁未即位秋九月有星孛于西方其本值尾箕末至牽牛及天漢十六日不見

元年冬十月詔曰蓋聞古者祖有功而宗有德孝文皇帝德厚侔於天地利澤四海而廟樂不稱朕甚懼焉其奏昭德四時之舞丞相嘉等奏尊孝文廟為太宗奏昭四時之舞令郡國皆立太宗廟四時舞孝文所作以明天下之安和夏六月御史大夫陶青翟使匈奴結和親五月令民田收半租太中大夫任成周



呂棟校正



仁爲郎中令爲人陰重不泄衣敝不飾甚見親信上自幸其家者再賞賜甚厚仁常固讓諸侯羣臣贈遺無所受

二年冬十一月有星孛于西南令天下男子年二十始賦春三月立皇子德爲河間王闕爲臨江王余爲淮陽王非爲汝南王彭祖爲廣川王發爲長沙王夏四月壬午太皇太后崩六月丞相申屠嘉薨時內史晁錯貴幸穿太上皇廟壝垣爲舍門嘉奏請誅錯自歸上上曰此非真廟垣又我使爲之錯無罪嘉曰悔不先誅錯爲所賣遂歐血而死嘉爲人廉直初鄧通侍文帝有慢嘉曰朝廷之禮不可不肅文帝曰君勿言吾私之罷朝嘉檄召通通恐入言文帝帝曰若徃吾今召若通至嘉責之曰朝廷

者乃高皇帝之朝廷通小臣乃敢戲殿上大不敬當斬通頓首出血不赦文帝使使持節召通謝丞相曰此吾弄臣也君釋之通乃得免秋八月丁巳御史大夫陶青翟爲丞相左內史晁錯爲御史大夫封蕭何曾孫嘉爲列侯先是嘉兄則有罪失侯梁王來朝上與謙欽太后前上從容言萬歲之後傳於王詹事竇嬰者太后從兄子進曰天下者高帝之天下父子相傳漢之法矣陛下何得傳梁王太后怒絕嬰爲籍遂免匈奴和親

三年冬十月膠東下密八年七十餘生角角毛本志曰老人吳王象也年七十七國象也人不當生角猶諸侯不當舉兵向京師七國將反之應也十有一月白項烏與黑項烏共鬪楚國苦縣白項烏不

勝墮泗水中死者過半十有二月吳城門自傾大船自覆本志
以爲金沚木也吳地以船爲家天戒若曰國家將傾覆矣春正
月淮陽王正殿災吳王濞膠西王卬楚王戊趙王遂濟南王辟
光淄川王賢膠東王熊渠皆謀反初上爲太子時吳王太子入
朝與上博爭道無禮於上上以博局擲之而死送喪至吳吳王
怒曰天下一家何必來葬復遣還長安後稱疾不朝陰懷逆謀
時齊人鄒陽淮陰人枚乘皆遊吳乘諫曰夫以一縷之絲系千
鈞之重上懸無極之高下垂不測之深雖至愚之人猶知其絕
矣以君所爲危於累卵難於上天若變所爲易於反掌安於太
山今欲極天命之壽弊無窮之樂終萬乘之權不出反掌之易

以居太山之安而欲乘累卵之危走上天之難此愚臣之所大
惑也陽亦數諫吳王不聽乘陽皆去遊梁晁錯說上曰吳王驕
恣陰有逆謀今削之亦反不削亦反削之其反疾而禍小不削
則其反遲而禍大於是楚趙有罪先削吳王恐禍及身已爲使
者自見膠西王合謀發使約諸侯七國同謀南使南越北連匈
奴吳王下令國中曰寡人年六十二身自將小兒年十四亦爲
士卒先諸君年上與寡人同下與小兒等皆發移書郡國曰漢
賊臣晁錯侵奪諸侯地陛下多疾志逸不能省察欲舉兵誅之
敝國雖小精兵可得五十萬人南越分其卒半以隨寡人寡人
又得三十萬趙王固與胡王有約寡人鄧衣食積金錢修甲兵

聚糧食夜以繼日至今三十余年寡人金錢布天下諸侯王日
用之不能盡今人有能得大將者賜金五千斤封邑萬戶以城
邑降者封萬戶若率萬人降者如大將軍科他皆以差受爵吳
楚反書上聞晁錯議欲令上自將兵身留居守計未定錯素與
袁盎有怨錯言盎前為吳相宜知王謀而蔽匿不言使至於此
欲請治盎計未定盎密聞之乃夜因告竇嬰求見上言吳所以
反故錯方與上調兵食上問盎盎對曰吳王無能為也上曰吳
王即山鑄錢煮海為鹽誘天下豪傑白頭舉事何以言吳無能
為也盎對曰吳王銅鹽之利則有之安得豪傑而誘之吳王若
得豪傑亦將轉而為義則不反矣吳之所誘者無賴子弟亡命

鑄錢殺人故相誘以反錯曰盎莢之善上問計將安出盎曰願
屏左右上屏人獨錯在盎曰臣所言人臣不得知乃屏錯錯趨
避東廂意甚恨盎對曰吳楚言晁錯擅削諸侯地故先共誅錯
復其故地而罷兵今計獨有斬錯發使使吳楚七國赦其罪復
其故地則兵可無血刃而俱罷上默然良久遂從其計斬錯東
市拜盎為太常使使至吳吳王曰吾欲為東帝矣即劫盎使為
將盎不聽使一都尉以五百人圍守盎欲殺之初盎為吳相時
從吏私盜姦盎侍婢吏懼而盎馳自追之遂以侍婢及侍兒賜
之及見拘從吏適在守盎位為司馬乃夜與盎俱亡而還枚乘
獻書諫吳王曰昔秦西距胡戎之難北備榆中之關南距羗笮

之塞東當六國之鋒六國乘信陵之籍明蘇秦之要荆軻之威
并力一心以備秦然卒滅六國而并天下何則地利不同而民
輕重不等也今漢據全秦之地兼六國之衆修戎狄之義而南朝
羗笮此其地與秦地相什而民相百大王所明知也今夫佞諛
之臣不論骨肉之義民之輕重國之大小以爲吳禍此臣所以
爲大王患也夫舉吳兵以資於漢譬猶蠅蚋之附羣牛腐肉之
齒利劔鋒刃始接則無事矣天下聞吳率失職諸侯責先帝之
遺詔今漢親誅其三公以謝前過是大王之威加於天下而功
越於湯武矣夫吳有諸侯之位而實富於天子有隱匿之名而
居過於中國此臣之所爲大王樂也今大王還兵疾歸可十得

其半不然漢知吳有吞天下之心赫然加怒羽黃頭循江而下
襲大王之都虜東海之地絕吳餉道梁王飾車騎習戰射積粟
固守以逼滎陽待吳之飢大王雖欲反都亦不得已今大王去
千里之國而制於十里之內張韓之將北地弓高宿衛左右兵
不得下壁軍不得休息臣竊哀之吳王不聽二月辛巳朔日有
蝕之邳鄆有狗與豕交本志以爲趙王勃亂失類外交匈奴似
犬豕之行也絳侯周勃子亞夫爲太尉將三十六軍擊吳楚竇
嬰爲大將軍賜金五十斤嬰陳金廡下軍吏過輒令取爲用金
無入家者嬰屯兵滎陽曲周侯酈寄擊趙將軍欒布擊齊太尉
至霸上趙涉以布衣遮道說太尉曰吳楚聞將軍出兵必置伏

漢紀卷九
五
兵姦人於崤澠阨塞之間且兵事尚神密將軍何不從此右關
去趣藍田出武關指洛陽不過差一二日直入武庫擊鳴鼓諸
侯聞之以將軍從天降而下也亞夫從之已而使之搜都澠間
果得吳伏兵乃請涉為護軍亞夫既至洛陽見劇孟喜曰七國
舉事而不用孟吾知其無能為也孟者洛陽人為任俠行似魯
朱家亞夫問故父客鄧都尉計策安出對曰吳楚兵銳甚難與
爭鋒莫若引兵東北壁昌邑以梁委吳吳必盡銳攻之將軍深
溝高壘勿與戰使輕兵絕淮泗之口斷吳餉道使吳梁相弊而
糧食竭以全制其虛吳必破矣從之吳攻梁梁王急請救亞夫
亞夫不往梁王上書請救上詔亞夫救梁王亞夫不奉詔堅壁

昌邑而使其淮泗口兵絕吳餉道楚乏糧挑戰亞夫終不出夜
軍中驚而內相攻擊擾亂至於帳下亞夫堅卧不起有頃乃自
定矣吳夜攻營壁東南亞夫使為備西北吳精兵果奔西北不
得入吳楚既飢乏乃引兵去亞夫出精兵追擊大破之是時弓
高侯韓頹當為將軍擊吳楚功冠諸侯吳王棄軍與壯軍數千
人亡走江南保丹徒
三月吳楚平越人斬吳王頭以降

吳之圍梁也梁將張羽韓安國距之羽能力戰安國能持重故
吳兵不能進楚王戍軍大敗自殺戍初與吳通謀大中大夫申
公白公諫不聽胥靡之衣赭衣紉白春於市初曾有穆生及申
公白公皆與元王俱學詩於浮丘伯浮丘伯者荀卿門人也元

王常禮此三人穆生不飲酒常爲設醴及王戌一朝失不設醴
穆生將去申公白公止之曰不爲先王乎穆生曰先王之禮吾
三人者爲道之存也今而忽之是亡道亡道之君胡可與久處
易稱知幾其神乎不去楚人將鉗我於市遂謝病而去申公白
公獨留故及於難膠東膠西濟南淄川趙王皆伏誅徙廣川王
爲趙王初七國反連齊齊王城守留濟南膠東淄川三國兵共
圍齊齊王使路中大夫使於天子天子令還報齊堅守路中大
夫還三國將劫而與之盟令反其言曰吳已破漢矣大夫既許
至城下望見齊王言漢發兵百萬使太尉擊破吳楚方引兵救
齊必堅守三國之兵殺之齊被圍急陰與三國約未定會路中

大夫至復堅守漢將聞齊初有謀欲擊齊齊王將問懼自殺上
以齊迫脅非其罪乃立其太子壽爲齊齊北王志亦初與諸侯通
謀後乃堅守聞齊王自殺而得立嗣志亦欲自殺齊人公孫蠆
止之因爲說梁王曰夫濟北之地東接強齊南當吳越北脅燕
趙此四分五裂之國權不足以自守勢不足以扞寇雖墜

言於吳非其正計也昔鄭祭仲許宋人立公子突以全其君
春秋賢之爲其以生易死以存易亡嚮使濟北先見情實則吳
必先屠濟北招燕趙而總之如此山東之從結而無郟矣今吳
楚之王練諸侯之兵驅徒衆而與天子爭衡濟北獨厲節堅守
不下使吳失據而無助跬行而獨進瓦解土崩敗而無救者未

必非濟北之力以區區之濟北而與諸侯爭強是猶羔犢而扞
虎狼也守職志不撓可謂誠一矣功議如此尚見疑於上願
大王詳思惟之梁孝悅馳以聞濟北王得不坐徙封於留川徙
衡山王爲濟北王吳之反也衡山王勃堅守無二心故謚曰貞
王徙廬江王賜爲衡山王初吳楚使至淮王欲發兵應之其相
曰王必應之臣願爲將王屬之兵相因守城而距吳楚會漢救
兵至故淮南王得以完全初晁錯改制削諸侯地錯父從潁川
來諫止之錯曰不然社稷不安父曰劉氏安矣晁氏危矣遂歸
去之曰吾不忍見禍及其身乃服藥而死後十餘日吳楚反晁
氏族矣初謁者僕射鄧公校尉擊吳楚還上書言軍事上問吳

楚反聞晁錯死兵罷否對曰吳楚爲謀數十年發怒削地以誅
錯爲名其意不在錯也且晁錯患諸侯強大故請削之以安京
師萬世之利計畫始行卒受大戮內杜忠臣之口外爲諸侯復
讎臣竊爲陛下不取也上喟然長息曰公言善吾亦恨之夏六
月立元王子平陸侯禮爲楚王續元王後初諸侯得自除吏御
史大夫已下官屬擬於天子國家唯置丞相黃金印自吳楚反
之後奪諸侯權爲置二千石去丞相曰相銀印其後惟得衣食
租稅而已貧或乘牛車時欒布有功封欵侯爲燕相有治迹民
爲之立生祠立皇子湍爲膠西王勝爲中山王賜民爵一級徙
淮南王余爲魯王徙汝南王非爲江都王王故吳國也非年十

五有才氣吳之反也非上書請擊吳上賜非將軍印吳破以軍功封賜天子旌旗論曰江都王賜天子旌旗過矣夫唯盛德元功有天子之勳乃受異物則周公其人也凡功者有賞而已孔子曰必也正名乎唯器與名不可以假人人君之所司也夫名設於外實應於內事制於始志成於終故王者慎之

四年春復置諸閔用傳出夏四月己巳立皇子榮為皇太子徹為膠東王六月赦天下賜民爵一級七月臨江王閔薨謚無子國除

五年春正月作陽陵邑夏募民徙陽邑錢戶二十萬遣公主妻匈奴單于

六年冬十有二月雷雨秋九月皇后薄氏廢皇后薄太后兄女上為太子時太后取以配上無寵無子故廢梁王來朝上使乘輿馳駟馬逆梁王於闕下入則侍帝出則同輿梁王侍郎謁者著金貂出入天子殿門與漢官無異居其國驕僭營東苑方三百餘里廣睢陽城七十里得賜天子旌旗千乘萬騎出稱警入言蹕擬於天子珠玉寶器多於京師招延遊士四方並至梁王親而有功太后少子愛之太后心欲以為漢嗣大臣袁盎等十餘人議於前不聽梁王怒之陰使人刺殺盎其餘人未得上疑梁王所為先是齊人公孫詭羊勝多奇邪計初見梁王梁王賜千金官至中尉號將軍常為王內謀上使使案梁捕勝詭勝

詭等自殺上召故雲中太守田叔使案梁王具得其事還報曰
陛下無以梁為事也今梁王不就誅是漢法不行也若其伏法
太后食不甘味卧不安席此憂在陛下上善之以為魯相枚乘鄒
陽數諫梁王不聽及梁王事急梁王賞賜千金令求方略士齊
人王先生多奇鄒陽往見之王先生曰必見王長君長君者王
夫人兄也陽發悟於心遂見長君曰竊聞長君女弟幸於後宮
而長君行迹多不順道理今梁事既窮竟梁王恐誅此太后怫
鬱泣血無所發怒側目切齒於貴臣恐長君危於累卵長君誠
為上言之得無竟梁事太后厚德長君而長君之女弟幸於兩
宮金城之固也昔舜之弟象日以殺舜為事而舜封之有庠仁

人之於兄弟也不含怒不宿怨厚親愛而已曾公子慶父使僕
人殺子般季友不探其情而誅焉春秋以為失親親之道以此
說天子僥倖梁事得不奏長君曰敬諾入言之及梁內史韓安
國亦因長公主解說梁王卒得不治初陽為勝詭所讒王因囚
之將殺之乃從獄中上疏曰臣聞忠無不報信不見疑蓋有以
然今定虛矣昔者荆軻慕燕丹之義白虹貫日太子畏之衛先
生為秦畫長平之策太白蝕昴昭王疑之夫精誠變於天地而
信不喻於兩主豈不哀哉今臣盡忠畢義左右不明卒從吏訊
為世所疑是使荆軻衛先生復出而燕秦不悟矣昔玉人獻寶
楚王誅之李斯竭忠胡亥極刑是以箕子佯狂接輿避世恐遭

此患也。願大王察王人李斯之意，然後改楚王胡亥之聽，無使臣爲箕子，接輿所笑。夫偏聽生姦，獨任成亂。是以魯聽季孫之說而逐孔子，宋信子罕之計而囚墨翟。夫以孔墨之辨，不能自免於讒諛，而二國以危者，何則？衆口爍金，積毀銷骨。臣聞明月之珠，夜光之璧，以闇投之人，莫不案劍而怒；何則？無因而至前也。蟠木根柢，輪困離奇，而爲萬乘之器者，以左右先爲之容也。故女無美惡，入宮見妬；士無賢愚，入朝見嫉。昔司馬喜臞脚於宋，宰相中山范雎折脅於魏，卒爲應侯。此二人者，信必然之畫，捐朋黨之私，挾孤特之交，故不能自免於讒諛之人。是以申徒狄蹈雍之河，徐衍負石入海，皆不容於世。義不苟取，比周於朝。

百里奚乞食於路，秦穆公授之以政，審威飯牛車下，齊桓公任之以國。此二人者，豈素官於朝，假譽於左右哉？感於心，合於行，堅如膠漆，衆口所不能離。豈惑於浮辭哉？是以聖主不牽於卑辭之語，不奪於衆多之口，獨化於陶鈞之上，而觀乎昭曠之道。臣聞盛飾入朝者，不以私汙義；砥礪名號者，不以利傷行。今欲使天下寥廓之士，誘於威重之權，脅於勢位之貴，迴面汙行，以事諂諛之人，而求親近於左右，則士有伏死窟穴，巖石之中耳。安肯盡忠信而趣闕下者哉？書奏，梁王立出之，以爲上客。枚乘以數諫，吳王上拜乘弘農都尉，乘久爲諸侯上客，不樂爲郡吏。後患免遊於梁，田叔旣至，魯魯民以王取財，邀相自言者。

百餘人叔取渠率少警怒之曰王非汝主邪何敢自言王王慙乃取中府錢令償之相曰王自使人償之今令相償之是王爲惡而相爲善王好遊獵叔常從王輒休相就館叔坐苑外曰吾王暴露獨何爲舍王以故不復出遊

七年冬十有一日庚寅日有蝕之春正月皇太子榮廢爲臨江王榮帝長子栗姬之子常囑諸子於栗姬曰百歲後善視之栗姬素怨言不遜上乃廢姬及太子栗姬以憂死二月罷太尉官夏四月乙巳立皇后王氏初皇后嫁爲金王孫妻其母藏兒卜相之當貴乃奪金氏而內太子宫王后方姪身夢日入懷遂生男丁巳立膠東王徹爲太子實王皇后子也中尉衛綰

爲太子太傅綰太陵人也爲人謹慎敦厚上爲太子時常召文帝左右近臣飲酒綰獨稱疾不行及上即位將幸上林詔綰參乘上謂綰曰今君知所以參乘乎乃我爲太子時召君不來故文皇帝有遺言曰綰長者善遇之六月乙巳丞相陶青翟免太尉周亞夫爲丞相是歲太僕周舍爲御史大夫

中元元年夏四月赦天下賜民爵一級封周昌孫荀爲列侯二年春令諸侯王薨及列侯初封及之國大鴻臚奏謚誅筴列侯薨及諸侯王太傅初除之官大行奏謚誅筴王薨遣光祿大夫弔棧祠贈視喪事因立嗣列侯薨遣太中大夫弔祠視喪事立嗣其葬國得發民輓喪穿復土治冢無過三百人事畢春二月臨江

王榮坐侵宗廟墻垣為宮上徵榮臨江官屬祖榮於北門外升
車軸折父老泣曰我王不還矣至邳王詣中尉邳都責訊王王
恐自殺葬藍田有驚數千萬頭銜土置冢上百姓怜之無子國
除邳都河東人也為人剛勇而有氣公廉常稱曰昔親事君固
當奉節死職終不顧妻子矣嘗從上入上林賈姬在厠野豕入
厠上目都都不行上欲持兵救賈姬都伏上前曰亡一姬復一
姬進陛下縱自輕柰高廟太后何上還豕亦不傷賈姬都為中
尉丞相條侯至貴倨也而都揖之貴戚宗室側目而視號曰鷹
是時濟南閻氏三百餘家豪猾放縱二千石莫能折也及都為
濟南相誅閻氏首惡郡中震慄道不拾遺旁十餘郡畏都如大

府後為鴈門太守匈奴不敢近鴈門胡王為偶人像都令騎射
莫能中其見憚如此匈奴中法帝欲釋之太后以臨江王之死也怨
之遂斬都是時甯成周陽由此皆嚴剋為治成為濟南都尉邳
都為前後都尉皆步入府門因吏謁見如縣令及成至直凌都
出共上然都素聞其聲亦與結歡後成為中尉其治放邳都其
廉弗及也自此之後吏治多放成由者已是時季布弟季心亦
任俠立然諾作氣蓋關中方數千里士爭為之死心為中尉司
馬邳都為中尉不敢加也夏四月有星孛於西方立皇子越為
廣川王寄為膠東王秋七月更郡為太守尉為都尉九月封楚
趙傅相死事者四人子為列侯甲戌晦日有蝕之

三年冬十一月罷諸侯王御史大夫官夏四月旱秋九月蝗有星孛于西方戊戌晦日有蝕之既丞相周亞夫免御史大夫周舍爲丞相立皇子乘爲清河王太子太傅衛綰爲御史大夫四年春三月起德陽宮夏蝗秋赦天下徙作陽陵者死罪欲腐刑者許之十月戊午日有蝕之

五年夏四月立皇子舜爲常山王六月赦天下賜民爵一級秋八月己酉未央東闕災九月詔曰獄者人之大命死者不可復生諸獄疑雖文致於法人心不厭者輒讞之

六年冬十月行幸雍祠五峙十有二月定鑄錢僞黃金法棄市令春三月雨雪夏四月梁王武薨詔曰孝王時梁王北獵梁有

獻牛足出背上本志以爲牛禍思心務亂之咎也乃分梁爲五國盡封梁孝王男五人女五人皆食湯沐邑五月丙戌立梁孝王子明爲濟川王勗爲留川王彭離爲濟南王定爲山陽王識爲濟陰王不疑爲衡山王詔令吏二千石車朱兩輪千石至六百石車朱左輪詔有司減笞法自除肉刑之後笞五百三百率多死者故定律笞五百曰三百三百曰一百猶尚不全又詔曰笞者所以教之也其宜定捶令長五尺其本大一寸末大半寸皆平其節當繫笞者不得更人笞畢一人笞乃更人自是笞者得全六月匈奴入鴈門至武威酒泉邑入上郡取苑馬吏卒戰死者三千人秋七月辛亥晦日有蝕之

後元元年春正月詔曰獄者重事也其疑獄有令讞之而後不當讞者不為失三月赦天下賜民爵一級中二千石諸侯相爵右庶長夏大酺五日五月地震秋七月丙午丞相周舍免乙巳先晦一日日有蝕之八月壬辰御史大夫衛綰為丞相衛尉直不疑為御史大夫不疑南陽人也好黃老術隱名迹初為郎其同舍郎有告歸者誤持其同舍郎金去郎意不疑不疑買金償之後告歸者還乃知之或疑不疑淫媵不疑曰我乃無兄終不自明矣吳楚反時為將軍封塞侯條侯周亞夫下獄死時為父買尚方工官甲稍五百枚可以葬者取庸治之不與顧直庸怒仰上變反告之事連亞夫召致廷尉責問君侯欲反邪亞夫曰臣所買乃葬器何謂反乎吏曰君侯縱不反地上即反地下耳初捕亞夫亞夫欲自殺其夫人止之及至廷尉因不食五日歐血死亞夫為河內太守許負相之曰君侯三年為侯八年為將九年為相貴重於人臣無二其後當餓死縱理入口餓死法也居三歲兄勝有罪免文帝封亞夫續絳侯後盡如負言上欲廢栗姬太子亞夫固爭之不得上由是疏之而梁孝王以吳楚之圍怨亞夫不救每朝常與太后言亞夫之短太后欲封其兄王信上謙讓不許太后曰人生各以時行耳竇長君在時不得侯及死其子彭祖乃侯吾甚恨之帝趣侯信也上曰請得與丞相計之亞夫曰高皇帝約非劉氏不王非有功不侯不如約者

天下共擊之上默然遂不封論曰高皇帝刑白馬而盟
曰非劉氏不王非有功不侯不如約天子也而曰天下
共擊之是教下犯上而興兵亂之階也若後人不修
是盟約不行也書曰法惟上行不惟下行若以為典未
可通也匈奴徐廬等五人降上欲封之亞夫曰彼背其
主陛下何以責人臣守節哉上曰丞相議不可用乃
悉封之論曰春秋之義許夷狄者不一而足也若以利
言由之則以功封其逋逃之臣賞有等差可無列上矣
上常居禁中召亞夫賜食獨置大馘無商又不置箸亞夫心不
平顧謂掌席者曰箸亞夫前食既出上目送之曰此快快非少
主之臣也亞夫以數忤上意故得罪也

二年冬十月詔省列侯之國春匈奴入鴈門太守馮敬與戰死
發車騎材官屯鴈門以歲不登禁食馬粟食馬粟者沒入之封
皇后兄王信為孟侯夏四月詔曰雕文刻鏤傷農事者也錦繡
纂組害女功者也農事傷則飢之本女功害則寒之原夫飢寒
並至能不為非者寡矣朕親耕后親桑以奉宗廟粢盛祭服以
為天下先不受獻減太官省徭賦欲天下務農蠶常有畜積以
備災害強無凌弱衆不暴寡者老以壽終孤幼得遂長今歲或
不登民食頗寡其各安在或詐為吏以貨賂為市盜奪百姓侵
侮萬民縣丞長吏縱姦法與盜甚無謂也其令二千石各修其

職不事官職耗亂者丞相以聞請其罪布告天下使明知朕意
自漢初務勸農累世承業至是始天下殷富家給人足京師之
錢累百巨億貫朽而不可校太倉之粟充實露積於外腐敗而
不可食衆庶街巷有馬阡陌之間成羣守閭閻者食梁肉為吏
者長子孫居官者以官為姓號人人自愛而重犯法仁義興焉
三年春正月詔萬民采黃金珠王者坐贓為盜詔曰高年者人
所尊敬鰥寡孤獨者人所哀憐也其令八歲以下八十已上及
孕子未乳當鞫繫者無訟繫之

甲午帝崩于未央宮遺賜諸侯王列侯馬二駟吏二千石黃金
二斤民戶百錢出宮人復終身讚曰本紀稱周秦之弊密文峻
法而姦不勝漢興掃除苛政與民休息至於孝文加之恭儉孝
景遵業五六十載之間至於移風易俗黎民醇厚周云成康漢
稱文景美矣

漢紀卷之九

漢紀卷之十

荀悅著

呂柟校正

孝武一第十

景帝太子母王夫人名徹

皇帝甲子即位年十六二月癸酉孝景帝葬陽陵三月尊太后
毋藏兒為平原君封田蚡扶吻田勝為列侯藏兒初為槐里王
仲妻生太后後改嫁長陵田氏生蚡及勝

建元元年冬十月詔舉賢良方正丞相衛綰奏所舉賢良或治
刑名縱橫之術亂國政罷之春三月赦天下賜民爵一級民
年八十復二算九十復甲卒行三銖錢夏四月詔民年九十已
上復子若孫令奉供養五月詔修山川之祀六月丞相衛綰免
丙寅魏其侯實嬰為丞相武安侯田蚡為太尉秋七月詔省衛

士卒萬人罷苑馬賜貧民遣使者安車蒲輪束帛加璧徵魯申公議立明堂申公年八十餘矣上問以政事對曰為治者不致於多言顧力行何如耳拜為太中大夫漢興草創尚簡易未甚用儒者而竇太后好黃老術故諸博士具官待問未有進者至上即位乃崇立太學矣

二年冬十月丞相竇嬰太尉田蚡皆免御史大夫趙綰郎中令王臧下獄死蚡嬰縮臧皆同心欲興太學建立明堂以朝諸侯而嬰請無奏事太后又罷竇氏子弟無行者絕屬籍故謗毀日至竇太后怒皆抵之罪明堂遂不立春二月丙戌朔日有蝕之三月己未太常許昌為丞相夏四月戊申有星如日夜出初

置茂陵邑徙郡國豪傑於茂陵河內郭解在徙中衛將軍為言

解家貧不應徙上曰解布衣權至使將軍知之此不貧也及解徙

諸公贈送出千餘萬解任俠睚眦上崖觸死於塵中者甚衆臧

匿亡命攻剽作姦不可勝數然折節恭約厚施而薄望解嘗出

有人箕踞視之者解問其姓名客欲殺之解不聽乃陰使吏脫

其徭役其人乃肉袒謝罪解姊子與人爭不直人殺之自歸解

解曰吾兒不直公殺之故當縱之諸公聞之皆多賢解洛陽人

有相仇者賢豪居其間以十數人不能和解客乃令解見仇家

仇家聽命解夜至夜去解乃謂仇家曰解如何從他郡奪人邑

中權乎且須士大夫復居其間乃聽之其居家夜過半後門間

住車常十餘乘有與解忤者少年輒為報仇不使解知也解兄子為解殺人為其家人上書自訟之又殺之闕下上捕解解亡過臨晉籍少翁少翁素不知解然慕其名送之出閔自殺以絕口語其得人率如此豪賢知與不知聞聲爭與交歡後捕得解所犯皆在赦前後有謗毀解者客殺之斷其舌解實不知有司奏解無罪時公孫弘為丞相以為解布衣以睚眦殺人雖不知甚於知遂族之論曰世有三遊德之賊也一曰遊俠二曰遊說三曰遊行立氣執作威福結私交以立強於世者謂之遊俠歸辨辭設詐謀馳逐於天下以要時勢者謂之遊說色取仁以合時好連黨類立虛譽以為權利者謂之遊行此三遊者亂之所

由生也傷道害德敗法惑世失先王之所慎也國有四民各修其業不由四民之業者謂之姦民姦民不生王道乃成凡此三遊之作生於季世周秦之末尤甚焉上不明下不正制度不立綱紀廢弛以毀譽為榮辱不核其真以愛憎為利害不論其實以喜怒為賞罰不察其理上下相冒萬事乖錯是以言論者計薄厚而吐辭選舉者度親疎而舉筆善惡謬於衆聲功罪亂於王法然則利不可以義求害不可以道避也是以君子犯禮小人犯法奔走馳騁越職僭度節華廢實競趨時利簡父兄之尊而崇賓客之禮薄骨肉之恩而篤朋友之愛忘修身之道而求衆人之譽割衣食之業以供饗宴之好苞苴盈於門庭騁問交

於道路書記繁於公文私務衆於官事於是流俗成矣而正道壞矣遊俠之本生於武毅不撓久要不忘平生之言見危授命以救時難而濟同類以正行之者謂之武毅其失之甚者至於爲盜賊也遊說之本生於使乎四方不辱君命出境有可以安社稷利國家則專對解結辭之繹矣民之慕矣以正行之者謂之辨智其失之甚者主於爲詐給徒衆矣遊行之本生於道德仁義汎愛容衆以文會友和而不同進德及時樂行其道以立功業於世以正行之者謂之君子其失之甚者至於因事害私爲奸軌矣其相去殊遠豈不哀哉故大道之行則三遊廢矣是以聖王在上經國序民正其制度善惡要於公罪而不淫於毀

譽聽其言而貴其事舉其名而指其實故實不應其聲者謂之虛情不覆其貌者謂之偽毀譽失其真謂之誣言事失其類者謂之罔虛偽之行不得設誣罔之辭不得行有罪惡者無僥倖無罪過者不憂懼請謁無所行貨賂無所用民志定矣民志既定於是先之以德義示之以好惡奉業勸功以用本務不求無益之物不畜難得之貨絕靡麗之飾遏利欲之巧則淫流之民定矣而貪穢之俗清矣息華文去浮辭禁偽辨絕淫智放百家之紛亂一聖人之至道則虛誕之術絕而道德有所定矣尊天地而不瀆敬鬼神而遠之除小忌去淫祀絕竒怪正人事則妖僞之言塞而性命之理得矣然後百姓上下皆反其本人人親其

漢紀卷十
親尊其尊修其身守其業於是養之以仁惠文之以禮樂則風俗定而大化成矣

三年春河水決溢於平原大飢人民相食賜茂陵徙者戶錢二十萬田二頃初作便門橋秋七月有星孛於西北濟北王明廢遷房陵坐殺太傅中尉閩越圍東甌告急上以問太尉武安侯田蚡蚡以為越人相攻其常事也又數反覆不煩中國自秦時棄之不內屬有詔太中大夫嚴助詰蚡曰但患力不能救德不能覆誠能何棄之且秦時舉咸陽而棄之何乃越乎今小國以窮困告急於天子天子不能救當安所訴又何以子萬國乃遣助使持節發會稽兵救之未至閩越走九月丙子晦日有蝕之

起上林苑時上使太中大夫吾丘壽王舉籍蓋屋以東宜春以西北自阿城屬之南山隄封頃畝價直欲除以為苑侍郎東方朔進諫曰臣聞謙遜靜慤天應以福驕盈奢靡天應以禍鄼鄙之間號曰土膏其價畝直一金規以為苑上乏國之用下奪農桑之業不可一也盛荆棘之大崇虎狼之墟壞民冢墓發民廬舍令幼小懷土而思耆老流淚而悲不可二也斥而營之垣而圍之馳騎逐東西車輦駕南北有深溝大渠險阻之危不可三也務苑囿之大不卹農時非所以強國富民也夫殷作九市之宮而諸侯叛楚靈王起章華之臺而楚人散秦興阿房之殿而天下亂上乃賜金百斤拜為太中大夫然猶起上林苑朔字曼

清平原人也好學稱為滑稽年二十三初為郎中上書自稱待
詔公車奉祿薄朔謂侏儒曰上欲盡殺汝侏儒大恐皆叩頭
號泣上召問朔朔對曰侏儒長三尺臣朔長九尺三寸俸祿正
等侏儒侏儒飽欲死臣朔飢欲死臣言可用宜異其祿不可用
罷之無但虛索長安米也上大笑使待詔金馬門稍稍親近之
上置守官於盆下使筮者射之莫能中朔自請布卦射之曰臣
欲以為龍復無角臣欲以為蛇復有足跂跂脉脉善緣壁此非
守官當是蜥蜴上曰善復使射他物連中輒賜帛時有幸倡優
郭舍人等曰朔幸中耳乃復覆置樹上寄生於盆中曰朔知之
榜臣百不中賜臣帛朔曰是筮數也舍人曰朔果不能中朔

曰濕肉為膾乾肉為脯樹上為寄生盆下為窶數乃榜舍人百
朔對問響應權變鋒出文章辭令橫無窮上頗倡優畜之然而
時發忠直之言極諫尤亦以此異焉朔因設客難已用位卑以
自慰論文多不錄又設非有先生之論其辭曰非有先生仕於吳默
然無言者三年吳王怪而問之曰可以談矣先生伏而唯唯王
曰可以談矣先生曰於戲可言乎哉談何容易王曰何為其然
也寡人將聽焉先生對曰昔閔龍逢深諫於桀王子比干直言於紂
此二臣者皆盡忠極慮將以為君之榮除君之禍也然以蒙不
辜之戮為天下笑飛廉惡來巧言利口以進其身陰奉雕琢刻
鏤之好以納於上快耳目之欲以苟容為度而見親近故宗廟

崩弛國家丘墟夫卑身賤體悅色微辭愉愉响响終無益於主
上之治即志士仁人不忍為也儼然而作矜莊之貌深言直諫
上以拂人主之邪下以除百姓之害則忤於時主之心離於衰
世之法故養性愛命之士莫肯進也遂隱居深山以詠先聖之
風是以伯夷叔齊餓于首陽之下後世稱其人如是邪主之行
固足畏也故曰談何容易於是吳王瞿然易容為坐而聽之先
生曰昔伊尹負鼎於湯太公釣於渭濱而遇文王心合意同謀
無不成計無不從誠得其君也故能誅暴亂摠遠方一統類美
風俗而王業興矣太公伊尹以如此龍逢比干獨如彼豈不哀
哉故曰談何容易於是吳王默然俛而深思仰而泣曰嗟呼殆

余國之不忘也絲絲哉聯聯哉於是立明堂之朝齊君臣之

舉賢才布德惠施仁義恭儉節約減後宮之費損車馬之用

放鄭聲遠佞人省庖厨去奢靡卑宮室壞苑囿填池漸以與貧

民開內藏以資窮乏存者老卹孤獨薄賦歛省刑罰行此三年陰

陽調和萬物咸宜國無災害之變民無飢寒之色蓄積有餘囹圄

空虛鳳凰來集麒麟在郊遠方異俗慕義向風治亂之道存亡

之端若此易見然而人主莫肯為也悲夫是時上以安車蒲輪

迎枚乘乘年老道死而乘子臯亦以談說能為辭賦得幸比朔

上好自擊熊豕郎中司馬相如從上獵長楊長卿上疏諫曰臣

聞物有同類而殊能者故力稱鳥獲捷言慶忌勇則賁育然臣

之愚竊以爲人誠有之獸亦宜然今陛下好陵險阻射猛獸卒
然遇逸羣之獸駭於不存之地犯屬車之清塵與不及還轅馬
不及旋踵人不暇施巧雖有烏獲逢蒙之技而不及用枯木朽
株盡爲患難矣是以胡越起於轂下而羗夷接軫矣豈不殆哉
雖曰萬全而無害然本非天子所宜近也且夫清道而後行中路
而後馳猶時有銜橛之變况涉乎豐草馳乎丘墟前有利獸之
樂內無存變之計其爲害也不難上善之相如字長卿蜀郡成
都人也初家貧與臨邛令王吉相善富人卓王孫置酒請令弁
請相如相如善鼓琴王孫寡女字文君好音夜奔相如遂與俱
歸成都後家貧夫妻之酤酒臨邛卓王孫恥之杜門不出後不得

已乃厚分財物遺文君而相如作子虛賦上得讀而善之曰朕
獨不得與此人同時或對曰司馬相如所作也上驚乃召相如
復奏上林賦拜爲郎中子虛上林皆言苑囿之美卒歸之於鄧
儉因託以諷焉相如口吃而善著書

四年夏有氣赤如血六月旱秋七月有星孛於東北江都相陳
人鄭當時爲內史每朝候上閑未嘗不言天下之長者其推轂
名士常以爲賢於己祿賜盡以饋士大夫家無餘財賓客甚盛
及中廢賓客衰落先是下邳翟公爲廷尉賓客填門及廢門外
可設雀羅復廷尉客復往翟公大板署其門曰一生一死乃知
交情一貧一富乃知交態一貴一賤交情乃見冬十月地震是

歲武強侯嚴青翟爲御史大夫

五年春正月己巳朔日有蝕之行半兩錢罷三銖錢初置五經博士博士本秦官掌通古今員至數十人漢置五經而已太常選人年十八以上好學補弟子郡國有好文學敬鄉里者令與計偕受業太常補弟子一歲輒課通經一藝補文學掌故高弟爲郎中其秀才異等太常以名聞其下才不事學者罷之是時廬江人文翁爲蜀郡太守其爲人愛學好教化見蜀地僻陋有蠻夷之風文翁乃選郡縣小吏有才器者輒給資用令詣博士受業還皆以爲右職用察舉之又脩起學宮於城中學者復除徭役常選學宮童子所在便坐受書每事常出入行縣益從諸

生明經修行傳教出入縣邑見而榮之由是蜀邑大化學者比齊魯焉郡國學校官自文翁始也夏四月平原君薨五月大蝗

秋八月廣川王越薨清河王乘薨

六年春三月乙未遼東高廟災夏四月壬子高園便殿災上素服五日其後太中大夫董仲舒居家推其意以高廟不當居遼東高園便殿不當居陵旁於禮不當立廟在外像諸侯不正者高園在內像大臣不正者天戒若曰去諸侯大臣貴幸而正者云爾時太中大夫主父偃素妬嫉仲舒竊其書奏之仲舒下獄吏當死詔宥之本志以爲淮南王田蚡之應也五月丁亥太皇太后崩六月癸未丞相許昌免武安侯田蚡爲丞相有星孛于東

漢紀卷一
九一
北方秋七月有星出于東方長終天本志曰是為蚩尤之旗以
彗星而終後曲見則天子征伐四夷之應也閩越圍南越南越
守天子約不敢發兵上遣大司農韓安國帥師出會稽大行王
恢出豫章救之淮南王安上書諫曰越方外之國斷髮文身之
人不可以冠帶之國法度治之自三代之盛明胡越不與受正
朔非強不能服也以爲不居之地不牧之民不足以煩中國古
者封內甸服封外侯服侯外賓服蠻夷要服戎狄荒服遠近之
勢異也越人名爲蕃臣實不給上事自相攻擊耳陛下以兵救
之是反以中國勞蠻夷也且越人故數反覆非一不奉詔舉兵
誅之臣恐中國兵革無時得息也間歲以來不登民生未復今

發兵行數千里舉輪而踰巖拖舟而入水行數千里夾以深林
叢竹又多蝮蛇猛獸夏月暑時則生吐泄霍亂之病曾未接兵
死傷者必衆多或以越人衆兵強能作難邊地臣竊聞之與中
國異限以高山人迹隔絕車道不通天地所以絕內外也其入
中國必先下巖水巖水之山峭峻漂石破舟不可大船運糧下
也越人欲爲變必先由餘干界內積糧食而入山伐材治船邊
地守候城使謹防越人有伐材輒收捕之焚其積聚雖百越無
柰邊城何也臣聞越卒不下數十萬人所以入者五倍乃足挽
車奉餉不在其中且越非有城廓邑里也處谿谷之間篁竹之
中習於水關便於用舟中國之人不知其地勢不能服其水土

雖有強兵百不當一臣安竊為陛下重之臣聞閩越王弟甲殺其王
甲以誅死其民衆未有所屬陛下若欲納之中國遣重臣臨問
存卹施德垂賞此必攜幼扶老以歸聖德若無用之則斷其絕
世存其亡國建其侯王此必委質為蕃臣矣陛下以方寸之印
尺二之組鎮撫方外不勞一卒不頓一戟而威德並行天下歸
服今以兵深入其地此必震恐以有司為欲屠滅之也必
雉死逃竄深入阻險背而去之則復羣聚留而守之卒勞糧乏
丁壯從軍老弱饋餉男子不耕婦人不織居者無食行者無
糧萬民苦於兵事逃亡必衆隨而誅之不可勝盡盜賊必起臣
聞秦時嘗使尉他屠睢擊南越又使監祿鑿渠通道越逃入山

林不可得攻留軍屯守空地曠日彌久士卒勞倦越人乃出擊
之秦師大敗乃發兵戍當此之時內外騷動百姓疲弊行者不
還往者莫返天下之人皆不聊生逃竄相聚羣為盜賊是故山
東之難興矣兵者凶器也一方有急四面皆聳臣恐變故姦
邪從此始矣易曰高宗伐鬼方三年克之以盛德之天子伐小
蠻夷而猶三年言用兵之難也陛下以四海為境九州為家八
數為圍江漢為池人徒之衆足以奉千官之供租稅之入足以
供乘輿之御玩心神明秉執聖道負黼屨憑玉几南面而聽斷
號令天下莫不響應使元元之民皆安土樂業則澤被萬世施
之無窮天下之安猶若太山而四維夷狄之地何足以為一日

之間煩汗馬之勞詩云王猶允塞徐方既來是時兵已出未逾
五嶺會閩越王弟餘善殺王以降漢罷兵上嘉淮南王之意美
將帥之功乃遣嚴助喻淮南之意且諷切南越南越頓首遣太
子隨助入侍是時嚴助薦邑子朱買臣為太中大夫買臣因說
東越王故居泉山一夫守險千夫不能上今更徙南五百里居
大澤中今發兵浮海直至泉山陳舟列騎席卷南行必破滅也
上即拜買臣會稽太守上謂之曰富貴不歸故鄉如衣錦夜行
今還故鄉富貴於子如何買臣頓首謝上既到郡與橫海將軍
韓說等俱擊東越大破有功初買臣家貧好讀書樵薪自給吟
詠且行時人謂之癡其妻恥之而去買臣笑曰我年五十當貴

今四十八矣待我富貴當報汝勤苦其妻患曰嘻公終餓死耳
何以報我遂改嫁其後買臣嘗負薪於墓間故妻與其夫俱上
冢以為得志見買臣飢寒呼飲食之後數歲為會稽太守故妻
與其後夫治道甚窮乏買臣命後車載其夫婦置後園中給衣
食經數月妻自縊死東海太守汲黯為主爵都尉黯字長孺東
郡人也好直諫上曰吾欲興政治法堯舜何如黯曰陛下內多
欲而外施仁義如何欲效堯舜之治乎上大怒變色而罷朝羣
臣共數黯黯曰天子置公卿輔弼之臣寧令從旨順意陷主於
不義乎自丞相宴見上或時不冠至見黯必冠上嘗在武帳不
冠望見黯奏事避入幃中使人可其奏其見敬禮如此初南越

漢紀卷之十一
人相攻黷為中謁者使越不至而報上曰越人相攻其常俗也
不足勞天子之使者河內失火燒千餘家使黷視之還曰人家
屋相焚相連乃不足為怪臣憂有甚於此者憂河內飢民相食
臣謹以按節發河內粟以賑飢民請受矯制之罪上賢而赦之
上嘗問嚴助曰汲黯何如人助曰使黯任職居官無以逾人然
至其輔少主威四夷守城廓愛百姓雖自謂賁育不能奪也上
曰然古有社稷之臣黯近之矣御史大夫嚴青翟免大司農韓
安國為御史大夫

漢紀卷之十一

漢紀卷之十一

荀悅著

呂柟校正

孝武二第十

元光元年冬初令郡國貢孝廉各一人董仲舒始開其議仲舒
廣川人也初景帝時為博士下帷讀書弟子以次傳授其業或
莫見面蓋三年不闕其園其精專如此進退容止非禮不行學
士皆尊師之後應賢良舉上策曰夫守文之君當塗之士皆欲
明先王之道以戴翼世主者甚衆然猶不能豈所操持失其統
歟固天降命不可復反歟必推之於大中而後息歟三代受命
其符安在災異之變何稱而起性命之情或夭或壽或仁或鄙

習聞其號未昭其理今欲風流而令行輕刑而姦改何修而臻
於此具明以喻朕意靡有所隱仲舒對曰臣謹按春秋以觀天
人之際甚可畏也國家將有失道之敗而天乃先出災害以譴
告之不知自省又降怪異以驚恐之尚不知變而後傷敗乃至
自非大無道之世天欲盡扶持而全安之事在勉強而已勉強
學問則聞見博而智益明矣勉強行道則德日起而大有功矣
詩云夙夜匪懈書云懋哉懋哉皆勉強之謂也昔周道衰於
幽厲非道亡也而幽厲不由道也宣王脩文武之業周道粲然
復至矣非天降命不可復反也所操持悖謬失其統也臣聞非
人力所致而自至者此受命自然之符也天下同心歸之若子

歸父母亦是受命之符也夫天瑞應精誠而至書曰白魚入於
王舟有火復於王屋流為赤鳥此蓋受命之符也及末代衰微
廢德義任刑罰刑罰不中則生邪氣邪氣積於下怨惡畜於上
上下下不和則陰陽繆戾而妖孽生矣此災異所緣而起也臣聞
命者天之令也性者生之質也情者人之欲也或夭或壽或仁
或鄙陶冶而成之不能純粹又治亂之所生故不能齊一也堯
舜行德則民仁壽桀紂行暴則民鄙夭夫天下之從上猶泥之在
鈞唯陶者之所為綏之斯安動之斯來此之謂也臣謹按春秋
求王道之端傳之於正正次王王次春春者天之所為也正者
王之所為也其意曰上承天之所為下以正已所為也然則王

者所爲必則於天道天道之大者在於陰陽陽爲德陰爲刑刑德不失而歲功成今廢先王德教之官而獨任執法之吏而欲德化之被四表固難成也春秋謂一爲元一者萬物所從始也元者辭之所謂本也謂一爲元者示太治而欲正其本也故爲人君者正其本心以正朝廷朝廷正以正萬民萬民正以正四方四方正遠近莫不皆正也則陰陽調而風雨時羣生和而萬物植福祥畢至而王道成矣孔子曰鳳鳥不至河不出圖吾已矣夫自傷不能致此物而身卑賤不能致也今陛下居得致之位又有能致之資然而天地未一應瑞者凡以教化之不立而萬民不正故也民之從利如水之走下非教化隄防之不能禁也

聖人之繼亂世掃除其迹而去之復修教化而崇起之夫秦滅先聖之道爲苟且之治故立十四年而亡其遺毒餘疾至今未滅琴瑟不調甚者必解而更張之爲政而不行之甚者必變而更化之漢承暴秦之後宜變其迹乃可善治三代相救夏尚忠商尚敬周尚文今漢宜少損周之文用夏之忠王者有改制之名無變道之實然所祖不同者救病扶衰所遭之變然也又曰古所謂功者以任官稱職爲美不謂積日累久也小材雖累日不離於小官賢才雖未久不害爲宰相是以有司竭其務治其業今則不然累日以取貴積久以致官是以賢不肖不得其直宜勿以日月爲功誠以賢能爲實使郡國各擇吏民之賢者

歲貢一人以給宿衛所貢得賢者有賞不肖者行罰如此率天下賢一可得而官也又曰積小者大慎微者著積善在身猶長日加益人不知也積惡在身猶火之消膏人不見也非明乎情性察乎流俗者孰能識之天之所分與與之齒者去其角傳其翼者兩其足是所受者大不得取其小也古之食祿者不食於民力是與天意同也昔儀休相魯去織婦拔園葵曰邑也已食祿矣又奪園夫妻女工之利乎夫遑遑求財利常恐匱乏者庶人之意也遑遑求仁義常恐不能化民者大夫之意也易曰負且乘致寇至此言處君子之位者不可以庶人行也又曰春秋大一統者天地之常經古今之通義也今師師異道人異論百

家殊方旨意不同是以上無以持一統法制數變下不知所守臣愚以為諸不在六藝之科非孔氏之術者皆絕其道勿使並進邪僻之說滅息然後統紀可一法度可明民知所從矣仲舒對策擢為江都相時易王甚驕而好勇問仲舒曰越王與大夫種后庸范蠡謀伐吳遂滅之孔子稱殷有三仁焉寡人亦以越有三仁仲舒對曰若魯君伐齊問柳下惠曰吾伐齊何如對曰不可歸而有憂色曰吾聞伐國者不可問仁人此問何為至於我哉徒見問耳且猶羞之况設詐而伐吳乎由是言之越本無一仁矣仁人者正其誼不謀其利明其道不計其功是以仲尼之門五尺之童羞稱五伯為其先詐力而後仁義也王曰善哉

及其去位居家絕不問家產業以修學著書為事所著凡百三十篇而說春秋事復數十篇朝廷有大議使者就其家而問之國家大議多仲舒發之春二月丙辰晦日有食之車騎將軍李廣屯雲中車騎將軍程不識屯鴈門以備匈奴六月罷廣隴西人也為將得士衆心無部曲行陣善就水草頓舍人人自便不擊刁斗自衛幕府少文書而程不識正行伍部曲營陣擊刁斗自衛吏治軍簿至明士卒不得自便而俱為名將夏四月赦天下復七國宗室削絕屬籍五月詔舉賢良秋七月癸未先晦一日日有蝕之是歲天星盡動搖上問候星者對曰星搖民將勞也

二年冬十月行幸雍祠五時始詔公卿議伏匈奴匈奴者其先

夏后氏之苗裔其在于古曰淳維匈奴始祖名薰粥氏山戎

獫狁是也始祖居於北邊隨水草畜牧而轉徙居無城郭耕田之業然亦各有分地無文法以言語為約束其俗寬則射獵急則習戰長兵則弓矢短兵則矛鋌見利則進不利則退食肉衣皮壯者食肥美老者飲食其餘父死則妻其母弟兄死皆娶其妻其俗有名不諱無文字自商周已來亡為中國患至匈奴姓孛鞮氏國人稱之曰撐黎孤塗若單于匈奴謂天為撐黎謂子為孤塗若言天子也單于者廣大之貌言其單于然也置左右賢王左右谷蠡王左右大將軍左右大當戶凡二十四長其大臣皆世官

職左賢王將居東方上谷之東北接穢貊朝鮮右賢王將居西方治上郡西接互羗而單于庭直代郡雲中歲正月諸王長少會單于庭五月大會龍庭而祭其先祖天地鬼神秋大會蹕林校閱人畜其法拔刃尺者死盜者沒入其家財單于朝拜日夕拜月其座長左而北面日尚戊己其送死有棺槨衣衾而無封樹喪服近幸臣妾從死者多至數十人舉事當隨月月盛壯則進兵月虧則退兵其攻戰斬首虜則賜一卮酒而得所虜獲因以與之得人因為奴婢故其戰人人自趣利秦始皇時使蒙恬得數十萬衆北擊胡悉收河南地因河為塞築四十四縣臨河徙謹人民以充之因山險谿峻繕治之起臨洮至遼東萬餘里是

時匈奴單于曰頭曼頭曼不勝秦北徙十有餘年頭曼太子名冒頓殺父而立是時東吳強盛使使請冒頓千里馬冒頓問羣臣羣臣皆曰此匈奴寶馬也勿與冒頓曰奈何與鄰國愛一馬乎遂與之又使人請冒頓一關氏冒頓問左右左右皆怒請擊之冒頓曰奈何與鄰國愛一女乎復以與之東胡以冒頓為畏已愈驕匈奴間有棄地不居者千里東胡又使求之冒頓問羣臣羣臣或曰此棄地與之於是冒頓大怒曰此地者國之本也何與之有斬言與地者即上馬令有後出者斬遂東襲擊東胡東胡不設備遂破滅東胡西擊月氏東并樓煩白羊河南悉收秦所奪地遂入代燕代北服渾窳屈射丁零高昆新黎之國控

弦之士四十餘萬自上古已來唯冒頓為強大高帝有平城之圍時冒頓為書戲慢甚不敬高后怒詔羣臣議擊之樊噲曰願將十萬眾橫行匈奴中中郎將李布曰噲可斬也高帝困於平城噲為大將軍不能以四十萬解高祖之圍而欲以十萬眾橫行匈奴中是面謾也且夷狄如禽獸得其善言不足喜得其惡言不足怒高后曰善乃遣使報單于書卑辭厚答遺以御車二乘馬十騎單于又遣使來謝至文帝遺老上單于書封以尺一牘印曰皇帝敬問單于單于報以尺二牘封皆大辭曰天地所生日月所置匈奴大單于敬問皇帝自是數侵邊及單于背約寇邊無已於是上議伐之太行王恢曰匈奴和親率不過數歲請擊

之御史大夫韓安國以為匈奴輕疾之兵也至如颶風去如流電居處無常難得而制今將卷甲親舉深入長驅從行則迫脅橫行則中絕徐行則後利疾行則糧絕難以為功聖人以天下為度者也不以私怒傷天下公議故高帝始結和親孝文遵其約二聖之迹足以為效主恢曰五帝不相襲禮三王不相沿樂各因時宜也且言擊之者固非發兵而深入也將順單于之欲誘而致之於邊選驍騎羽林壯士陰為之備吾勢已定或營其左或營其右或當其前或當其後單于必可擒也上從恢議夏六月護國將軍韓安國驍騎將軍李廣輕車將軍公孫賀屯騎將軍王恢材官將軍李息襲匈奴陰使鴈門馬邑豪聶壹詐亡

入匈奴謂單于曰吾能斬馬邑令以降則物可盡得也單于愛信之令歸為間壹乃詐斬死罪囚頭懸邑城上以示單于使者使者還單于乃將十萬騎入武川塞是時漢兵三十餘萬伏馬邑旁草中王恢李息約從代出擊輜重單于未到馬邑百餘里鴈門尉史行微單于大驚而還曰吾得尉史天也以為天王乃遠走兵追至塞不及乃罷上大怒恢首謀不出兵擊單于輜重也恢自殺時主父偃上書諫伐匈奴曰臣聞怒者逆德兵者凶器爭者末節數戰武未有不悔者也始皇務勝不休欲攻匈奴李斯諫曰匈奴無城廓之居委積之守遷徙鳥窠難得而制也輕兵深入糧食必絕運糧以行重不及事得其地不可以耕而食也

得其人不可伐而畜也勝必殺之非仁德也疲弊中國其心怨奴非完計也始皇不聽出兵攻胡却地千里皆斥鹵不生五穀然後發天下丁男以戍河北飛輿輓粟以遠轉輸率三十鐘而致一石天下所以叛也夫兵久則變生事善則慮易周書曰安危在與存亡在所用願陛下熟計之偃凡上十事其一事諫伐匈奴九事為律令燕人徐樂上書曰天下之患在於土崩不在瓦解秦之末世天下大壞是謂土崩吳楚七國之時是謂瓦解今關東比年穀不登民多困窮不安其處故易動易動者土崩之勢也故明主之要其在於使天下無土崩之勢而已臨淄人嚴安上書曰今天下奢侈車馬衣裘宮室皆競修飾夫養失而泰樂失而淫禮失而采教失而偽偽采淫泰非範

民之道也是以天下逐利而臣願為民制度以防其活使富貧不相懼以和其心心和志定則盜賊消刑罰少陰陽和萬物蕃也昔秦北構禍於胡南樹怨於越宿兵於無用之地丁男被甲丁女轉輸苦不聊生自經於野樹死者相望故絕世滅祀窮兵之禍也周失之弱秦失之強不變患也此三人同日上書上皆召見謂之曰公等家皆安在何相見之晚也皆拜郎中而偃一歲四遷至太中大夫上自即位好士既舉賢良赴闕上書自衛者甚眾其上第者見尊寵下者賜帛罷若嚴助朱買臣吾丘壽王司馬相如主父偃徐樂嚴安東方朔枚舉膠盞終軍嚴忌等等皆以材能並在左右每大臣奏事上令助等辨論之中外相應

以義理之文秋九月令民大酺五日

三年春河水徙自頓丘東南入于渤海夏五月封高帝功臣後五人並為列侯河決濮陽汎十六郡發卒十萬救河決起龍淵

官

四年冬十有二月魏其侯實嬰棄市初嬰女之貴重也田蚡常奉事之及嬰廢而蚡甚用事蚡從嬰請田嬰弗與曰老僕雖棄寧可以勢奪乎故太僕潁川灌夫與嬰善亦怒蚡蚡聞之曰蚡事魏其侯無所不可而愛數頃田且灌夫何預也灌夫家在潁川橫其蚡乃請案灌夫家事灌夫亦持蚡陰事賓客和之俱止蚡取燕王女為夫人太后詔列侯宗室皆當賀嬰過要灌夫欲與夫俱行

夫不欲往嬰曰事已和矣固請與行夫行酒至蚡蚡曰不得持
滿夫怒蚡因嘻笑曰將軍貴也釋之次至汲陰侯灌賢程不識
方相與耳語未得持酒夫乃發怒罵賢及程不識蚡謂夫曰程
李俱為東西衛尉今衆辱程將軍獨不為李將軍故乎李將
軍者李廣也夫素所敬也夫曰今日斬頭穿胷何知程李平座
稍稍罷出蚡令騎留夫或按夫頭令謝夫怒不肯謝蚡乃麾騎
縛夫召御史曰今日乃宗室有詔灌夫罵坐不敬繫君室按其前
事遣吏分捕灌夫支屬皆棄市實嬰欲救灌夫其夫人止之嬰曰
終不令灌仲孺死嬰獨坐乃還其家竊出上書召見具言灌夫
事不足誅上欲赦之蚡固爭之上令兩廷尉辨其事御史大夫

韓安國兩順之主爵都尉汲黯是實嬰內史鄭當時亦是實嬰而
復不堅其辭莫敢對上怒內史曰公平生數言魏其侯武安侯之
短長今日廷論乃有趨效轅下駒吾并斬若屬矣即罷起太后
怒不食曰我在也而人皆籍吾兄弟令我百歲後皆為魚肉乎
上使御史簿責嬰劾繫都慰嬰令兄子上書幸復召見初景帝時
嬰常受遺詔曰事有不便輒以便宜上案尚書大行無遺詔詔
書獨藏嬰家丞相乃奏劾嬰矯先帝令遂棄市而灌氏族矣
春三月丞相田蚡薨蚡疾一身盡痛若有人擊之者呼曰服罪服
罪上使見鬼者瞻之曰魏其侯與灌夫共手答之蚡初折節好
士以采名譽每奏事語移日所言輒聽薦人或起家至二千石

上曰君除吏盡未吾亦欲除吏其用事如此後甚驕恣堂請考
工地欲以益宅上怒曰何不遂取武庫蚡治宅舍諸甲第田園
極膏腴前堂羅鐘鼓立曲旃後室婦女以百數珍物玩好狗馬
不可勝數淮南王安來朝蚡以太尉迎安霸上謂安曰上未有
太子大王最賢高帝孫如一旦晏駕非大王當立誰哉淮南大
喜多厚贈蚡至灌夫事上不直蚡以太后故屈及後聞淮南王
事上曰若武安侯在族之矣初魏其侯用事賓客甚盛後廢賓
客皆移於武安侯唯灌夫獨不去初灌夫父張孟為潁陰侯灌嬰
舍人得幸嬰進之至二千石故冒灌氏姓吳楚及時孟以校尉
戰死時夫從軍不肯隨歸願取吳王頭若將軍以報父讎於是

被甲持戟募軍中壯士所善願從者數十人及出壁門莫敢進
獨兩人及騎奴十餘人馳入吳軍之麾下所殺傷數十人不復
得前還獨與一騎歸夫身中大創十餘處幾至於死創少瘳復
請行太尉固留之乃止由是勇義聞於天下夏四月隕霜殺草
五月地震赦天下丁巳平棘侯薛澤為丞相御史大夫韓安國
免秋九月中尉張歐為御史大夫以仁厚見尊重

五年春正月河間王德薨謚獻王德好學修禮樂造次必於儒
者道術之士自四方至者皆得古文之書先是來朝上策問三
十餘事具推道術而對文約旨明上甚重之夏發巴蜀民治南
夷道南夷道君長有十數夜郎最大其西靡漠之屬以十數靡

漢最大自靡漢以北君長以十數印都最大皆椎髻耕田有聚
邑其外西自桐師以東至葉榆名為越雋昆明皆編髮隨畜遷
徙無常居大君長地方可數千里自越雋以東北君長以十數
祚都最大自祚都以東北君長以十數舟馳最大其俗或土著或
移徙自舟馳以東北君長以十數白馬最大此皆巴蜀外西南
夷也初楚莊王使將軍莊躡循江畧地黔中南以西躡至靡漢
池方三百里其旁平地肥饒數千里既克定之會秦奪楚巴黔
中郡道塞不通躡以其衆王靡漢變服從其俗秦時嘗通伍
尺之道於此諸國頗置長吏漢興皆棄之及大行王恢之救越
也使鄱陽令唐蒙使於南越越食蒙以柏醬蒙問所從來曰從

西北牂牁江江漢廣數千里出番禺城下蒙因上書曰南越地
東西皆萬餘里名為外臣實一州主今以長沙豫章往來水道
絕難竊聞夜郎精兵可數十萬若從夜郎浮舩下牂牁出其不
意此制越一奇也可通夜郎道為置吏上許之乃拜蒙中郎將
發巴蜀兵千餘人奉幣帛見夜郎侯喻以威德為置長吏旁小
邑皆貪漢贈帛以為道遠漢中不能有也故皆且聽命司馬相
如亦言西南夷印祚可置都上悅之以相如為中郎將往喻意
皆聽命後西南夷數反發兵興徭役費用甚多相如知其難通
業已達之乃假巴蜀之論以諷上且以宣其使旨於百姓曰蓋
聞天子之於夷狄也其義羈縻勿絕而已今已罷三郡之士通

夜郎之途二年於茲而功不竟士卒勞倦萬民不贍今又接之以西夷百姓力屈恐不能卒業此使者之累也夫功侔西轅之人與中國不並也其已久矣仁者不能以德來強者不能以力并意者殆不可乎夫割齊民以附夷狄弊所恃以事無用鄙人固陋不識所謂使者答曰蓋世有非常之人然後有非常之事有非常之事然後有非常之功非常者固常人之所異也故曰非常之人黎民懼焉及臻厥功天下異然也夫賢君之踐位也豈將委瑣倥偬拘文牽俗循誦習傳當世取悅而已或將必崇論宏議創業垂統爲萬世規故馳騫於兼并容包而勤思乎參天兩地今封疆之內冠帶之倫咸獲嘉祉靡有闕遺矣而夷狄殊

俗之國遼絕異黨之地舟車不通人迹罕至政教未加風流猶微內之則犯義侵禮於邊外之則邪行橫作放殺其上君臣易位尊卑失序父兄不辜冲幼奴虜係縲嗥泣內鄉而怨曰蓋聞中國至仁德洋恩普品類羣物靡不樂其所今獨曷爲遺忘已舉踵恩望如枯旱之望雨上聖之心又焉能已矣故乃北出師以討強胡南馳使以誚勁越四面之人風德三方之君麟集仰流願得受號者以億計故乃闢沫若徼泮柯鏤靈山梁孫原創道德之塗垂仁義之統將博恩廣施遠撫長駕使䟽逖不閉夾習昧闇得曜光明偃甲兵於此息攻伐於彼遐邇同體中外提福不亦康乎夫拯民於沈溺奉至尊之休德反衰世之凌遲

漢紀卷五十一
三十一
繼周室之絕業天子之急務也百姓雖勞惡得已乎方將增秦山之封加梁父之事鳴和鸞而揚雅頌上咸五帝下登三王觀者未覩旨聽者未聞音夫鷦鷯已翔於寥廓而羅者猶視於藪澤豈不哀哉是時又發卒萬人治鴈門阻險秋七月大風拔木乙巳皇后陳氏廢皇后堂邑侯陳午女也午即嬰孫也嬰封堂邑侯午尚長公主嫖上為太子時長公主有力焉故太后取公主女配太子及為皇后驕恣擅權寵十餘年無子又挾婦人媚道故廢時長公主寡居五十餘矣有董偃者年十三隨其母賣珠於家主見其姣好因留第中出則執轡入則侍內使散財交士令府中曰董君所散一日金滿百斤帛滿千匹乃白之其後

主稱疾瘳請上臨之欲因是以見董偃上曰願謁主人公公主脫簪珥徒跣頓首謝因引偃偃著綠幘碧襦伏殿下上為之起寵遇之自是董偃貴寵聞於天下後上為主置酒宣室使謁者引納董君侍郎東方朔避戟而前曰董偃有斬罪三安得入乎偃以人臣私侍公主其罪一也敗男女之禮以傷王制其罪二也偃不遵經學以奢侈狗馬干上之欲始為淫首其罪三也上默然良久曰吾以業設酒後而改之朔曰不可夫宣室先帝之正處也非法度之正不得入也故淫亂之漸其變為篡豎貂為淫而易牙作患慶父誅而魯國全管蔡戮而周室安上曰善更置酒北宮引納董君賜朔金三十斤自偃之後諸公主行多僻

恣者矣上妹之子尚上女夷安公主驕放犯罪死左右爲之請
上流涕曰廢先帝之法吾何面目入郊廟乎乃哀不能自勝朔
進曰臣聞樂太甚則陽溢悲太甚則陰損聖王爲政賞不避仇
讎誅不阿親戚陛下行之天下幸甚臣昧死再拜上千萬壽上
掌問朔曰吾欲化天下豈有道乎朔對曰孝文帝自衣弋綈足
履革鳥集上書囊以爲殿帷以道德爲麗以仁義爲準於是天
下昭然大化今陛下崇苑囿起建章左鳳闕右神明號千門萬
戶木土衣緹繡犬馬被績罽官人簪璫瑁垂珠璣設戲車教馳
逐飾文采竒怪撞千石之鍾擊雷霆之鼓作俳優舞鄭女上爲
淫侈如此而欲民不奢佚事之難也陛下誠能用臣朔之計摧

甲乙之帳焚之於四達之衢却走馬之街示不復用則堯舜之
隆可與比而治也朔又上書自訟獨不得大官因陳農戰強國
之計數萬言專用商鞅韓非之語文旨放蕩頗復以恢諧終不
見用八月螟蟲徵賢良文學上策之曰蓋聞上古至治畫衣冠
異章服而民不犯陰陽和風雨時父不哭子兄不哭弟人迹所
及跛行喙息咸得其宜今何修而臻此乎仁義禮智四者之宜
安所施設天人之符廢興何如菑川人公孫弘對曰臣聞厚賞
重刑未足以勸善禁非必信而已矣是故因能而任官則分職
治去無用之言則事情得不作無用之器則賦歛省不奪民時
不妨民力則百姓富有德者進無德者退則朝廷明有功者上

漢紀卷之十一
無功者下則羣臣悅罰當罪則姦邪止賞當功則羣下勸凡此
八者治之本也故養民者禁之則不爭治之則不怨有禮則不
暴愛之則親上此有天下之急也罰不違義則民服而不離和
不遠禮則民親而不慢故畫衣冠異章服而民不犯者此道素
行也臣聞之氣同則相從聲比則相應人主和德於上則萬類
和洽於下故心和則氣和氣和則形和形和則聲和聲和則天
地之和應也故曰陰陽和風雨時甘露降五谷登山不童澤不
涸嘉禾興朱草生此和之至也故形和則無疾無疾則不失故
父不哭子兄不哭弟遠方民物莫不蒙化此和之極也臣聞之
致利除害愛憎無私謂之仁明是非立可否謂之義進退有度

身卑有分謂之禮擅殺主之柄通壅塞之路謂之權審輕重之數
論得失之道使遠近情偽必見於上謂之智術凡此四者治之大
用也得其要術則天下安樂法設而不用不得其術則主昏於
上官亂於下故天無私親順之則和起逆之則害生此天人之
符也時對者百餘人太常奏弘第居下策上擢弘對為第一召入
見容貌甚麗拜為博士待詔金馬門弘又上疏曰先世之吏正
故其民篤今世之吏邪故其民薄政弊而不行令倦而不聽夫
邪吏行弊政用倦令治薄民不可得而治此政之所以失也臣
聞周公旦治天下朞年而變二年而化五年而定唯下之所志
上以書答焉問弘稱周公之治強朕自視孰與周公賢對曰臣

漢紀卷之十一
愚淺薄無敢比於周公雖然愚心曉然見治道之所以然也夫
虎豹牛馬禽獸之不可制者及其教馴服習唯人之從臣聞採
曲木者不累日銷金石者不累月夫人之於利害好惡豈比禽
獸木石之類哉昔年而變臣弘常切遲之上嘉異其言

漢紀卷之第十一

